

佛為娑伽羅龍王所說大乘經

四百九十九

八七

51503



元祿九年丙子二月日重修

皇圖瓊閣 帝階綴昌

佛日增輝 懋輪常轉

山城州天安寺法金剛院置



佛為娑伽羅龍王所說大乘經

西天譯經三藏朝散大夫試鴻臚少卿傳教大師臣

施護奉

詔譯

如是我聞一時佛在大海中娑伽羅龍王宮莊嚴道場與大比丘眾七千五百人俱并諸得大智慧菩薩摩訶薩自十方世界皆來集會復有百千俱胝那由他梵王帝釋及護世等天龍夜叉乾闥婆阿脩羅誡嚕拏緊那羅摩睺羅伽等亦來集會爾時世尊見彼一切大眾來集會已告娑伽羅龍王言龍主觀此世間種種行業皆從妄起種種心法當感種種果報若彼不了當生種種之趣



龍王汝當觀此大海之衆見作種種士夫色相龍王而彼一切色相由於一切善惡身口意業各各之心種種變化然此心法雖云色相由如幻化無可取故

龍王此之色相一切諸法本無所生亦無主宰復無有我亦無礙故如是種種所作之業諸法自性皆幻化相不可思議

龍王若有菩薩知一切法無生無滅無色無相如實知已所作所修一切善業而無修作所有色相及蘊處界一切生法悉無所見彼若如實得是見已當復觀察殊妙色相龍王殊妙色相云何觀察當觀如來身相如來身

者皆從百千俱胝那由他福德之所生故又
如是之相云何嚴持云何恭信當得如是之
相復得人間天上無老無死復得十百千他
化自在天身乃至大梵天身此由心不散亂
專注觀想瞻仰如來最妙之身實知此身一
切色相殊妙莊嚴皆從善業所集而得

龍王如汝住宮一切莊嚴亦福所生至於梵
王帝釋及護世等乃至天龍夜叉乾闥婆阿
脩羅迦樓羅緊曩羅摩睺羅伽人非人等所
有一切莊嚴皆福所生

龍王又此大海之中所有衆生種種或有廣
大或復微細多住醜陋彼一切身皆由種種

心之所化龍王是故說言隨身口意業之所
得龍王如是之報以業爲因業爲主宰汝當
令諸衆生起智慧心所作所修隨學善業於
諸邪見不作不任知彼邪見非爲究竟如是
知已一切衆生當求爲師咸來供養并得天
上人間歸信供養龍王而有一法能令衆生
斷於一切惡趣之業云何一法所謂觀察善
法而彼善法云何觀察當觀自身我於日夜
行住坐卧所興心意無不是過如是覺察令
四威儀中諸不善法不得發生如是斷盡諸
不善法當令善法而得具足復使一切同善
衆生悉皆當得聲聞辟支及菩薩等乃至無

上正等正覺之位

龍王云何善法我今說之所謂十善之業是
爲一切根本安住是生天上人間根本安住
世間出世間殊勝善法根本安住聲聞辟支
佛菩薩根本安住無上正等正覺根本安住
云何爲彼根本安住所謂十善業道若能遠
離殺生偷盜邪淫妄語綺語惡口兩舌乃至
貪瞋邪見等若能如是遠離是爲十善業道
乃是世間出世間根本安住

龍王士夫補特伽羅遠離殺生獲得十種善
法云何十法所謂得無畏施他一切衆生得
任慈心得正行得不起一切衆生過失之念

得少病樂得壽命長得種種非人而作擁護
於眠睡覺寤皆悉安隱又得賢聖守護心不
厭捨於睡夢中不見惡業苦惱之事自得不
怖一切惡趣命終之後得生天上龍主士夫
補特伽羅獲得如是十種善法行菩薩道得
善心住善根成熟當得無上正等菩提

龍主士夫補特伽羅遠離偷盜獲得十依止
法云何爲十所謂得大富自在得免王難得
免水火賊盜冤家之難得多眷屬善順和睦
得多人愛樂不相苦惱凡所言說一切諦信
得無量財寶皆悉集聚得此方他方一切稱
讚於一切行處無怖無畏得他稱善名讚於

智慧又得色力壽命辭辯相應於親非親心
無分別不生惱害命終之後得生天界

龍主士夫補特伽羅遠離偷盜獲得如是十
依止法以彼善根於諸佛法自能證知當得
無上正等正覺

龍主士夫補特伽羅遠離邪婬獲得四智善
法云何爲四所謂降伏諸根離於散亂得世
間一切稱讚復得無量營從

龍主士夫補特伽羅遠離邪婬獲得如是四
智善法以此善根當得無上正等正覺復證
大丈夫陰藏隱密之相

龍主士夫補特伽羅遠離妄語獲得天上人

間八種善法云何為八所謂得口處清淨常
如青蓮華香又得世間一切正見得天上人
間一切愛樂得身口意清淨化彼一切有情
令住三業清淨之行得清淨已咸皆歡喜得
真實語言必誠信得過人辯所出言辭咸有
方便於天上人間離諸過

龍王士夫補特伽羅遠離妄語獲得如是天
上人間八種善法而彼善根獲得口業清淨
誠實正行當得無上正等正覺
龍王士夫補特伽羅遠離綺語當得三種一
向之法云何三種所謂得知法者一向愛樂
得一向真實復生智慧得一向為人天師天

上人間一切信樂

龍主士夫補特伽羅遠離綺語獲得如是三種一向之法已此善根迴向菩提得一切如來授記當證無上正等正覺

龍主士夫補特伽羅遠離惡口獲得八種口過清淨而得八種善法云何爲八所謂實語愛語依義語軟語離取語多人愛樂語善語有義利語

龍主士夫補特伽羅遠離惡口獲得如是八種清淨口業以此善根迴向菩提當來證得無上正等正覺復得最上清淨梵音

龍主士夫補特伽羅遠離兩舌當得五種堅

固云何五種堅固所謂得身堅固當得遠離一切怖畏之難故得眷屬堅固不為他人之所貪故得信堅固獲得信業果報故得法堅固獲得果證堅牢故得善友堅固常得愛語攝受故龍王士夫補特伽羅遠離兩舌獲得如是五種堅固以彼善根迴向菩提當證無上正等正覺使彼一切外道魔王等咸不能破壞故

龍王士夫補特伽羅遠離貪毒獲得八種善法云何為八所謂得貪心消除得殺心不生得嫉妬心不生得樂生聖族心為聖人尊重得慈心以善業利益一切衆生得身端正得

多人尊重得生於梵世

龍王士夫補特伽羅遠離貪毒獲得如是八種善法以此善法迴向菩提心不退轉當證無上正等正覺

龍王士夫補特伽羅遠離瞋毒當得五種勝願圓滿云何爲五所謂修身口意不退諸根不亂當得一切廣大富貴圓滿得寃家降伏得一切廣大福德圓滿得受人天最上供養得一切廣大功德圓滿於最上受用心所欲者皆得圓滿如爲富貴發百千最上勝願如願圓滿

龍王士夫補特伽羅遠離瞋毒獲得如是五

種圓滿以此善根迴向菩提證得無上正等
正覺而爲三界之所尊故

龍主士夫補特伽羅遠離邪見獲得十種功
德之法云何爲十所謂得自心安善及同行
善友深信因果得不爲身命作於罪業不久
獲得賢聖之位得不迷善法修人天行不墮
傍生及炎魔界行於聖道得最上福得離一
切邪法得離身見得見一切罪性皆空得天
上人間正行不闕

龍主士夫補特伽羅遠離邪見獲得如是十
種功德以此善根迴向菩提速能證了一切
佛法當得無上正等正覺

龍主復次觀於十不善法微細之行多墮地獄餓鬼畜生之趣龍主觀彼衆生若復殺生當墮地獄畜生焰魔等界後生人間以餘業故得二種報一者短命二者苦惱若復偷盜當墮地獄畜生焰魔等界後生人間以餘業故得二種報一者自居貧賤二者不得他人財寶若復邪淫當墮地獄畜生及焰魔界後生人間以餘業故得二種報一者愚癡二者妻不貞正若復妄語當墮地獄畜生及焰魔界後生人間以餘業故得二種報一者言不誠實二者人不信奉若復綺語當墮地獄畜生及焰魔界後生人間以餘業故得二種報

一者言不真正二者所言無定若復惡口當墮地獄畜生及焰魔界後生人間以餘業故得二種報一者言多鬪諍二者人間不重若復兩舌當墮地獄畜生及焰魔界後生人間以餘業故得二種報一者得下劣眷屬二者感親屬分離若復多貪當墮地獄畜生及焰魔界後生人間以餘業故得二種報一者不能利益他人二者常被他人侵害若復多瞋當墮地獄畜生及焰魔界後生人間以餘業故得二種報一者心常不喜二者多不稱意若復邪見當墮地獄畜生及焰魔界後生人間以餘業故得二種報一者邪見二者懈怠

龍主若有行於如是十不善法決定獲得如是果報復更別得無邊諸大苦蘊

龍主若復菩薩遠離殺生修菩薩道行於布施得大富長壽及無量福得離一切他侵之怖龍主若復菩薩遠離偷盜修菩薩道行於布施得大富貴及無量福而於一切心無悵惜證得深智諸佛所說無上法義

龍主若復菩薩遠離邪淫修菩薩道行於布施得大富貴獲無量福感善眷屬父母妻男悉無惡見

龍主若復菩薩遠離妄語修菩薩道行於布施得大富貴獲無量福當感所有語言一切

善軟凡起誠願堅固不退

龍主若復菩薩遠離綺語修菩薩道行於布施得大富貴獲無量福所言真實聞者信受凡有所說斷一切疑

龍主若復菩薩遠離惡口修菩薩道行於布施得大富貴獲無量福所言可取聞無背捨於諸衆中無有其過

龍主若復菩薩遠離兩舌修菩薩道行於布施得大富貴獲無量福於諸眷屬心住平等愛之如一無有離散

龍主若復菩薩遠離貪毒修菩薩道行於布施得大富貴獲無量福得端正身諸根具足

見者愛樂心無厭捨

龍王若復菩薩遠離瞋毒修菩薩道行於布施得大富貴獲無量福得於仇讎心無所起聞佛法要能生深信

龍王若復菩薩遠離邪見修菩薩道行於布施得大富貴獲無量福於三寶所而具正見常近於佛得聞妙法供養衆僧常無懈退教化衆生令發菩提之心

龍王若能修此十善之業行菩薩道初以布施而爲莊嚴果報圓滿得大富貴若以持戒而爲莊嚴果報圓滿得一切佛法願滿具足若以忍辱而爲莊嚴果報圓滿得佛菩提三

十二相八十種好復得梵音具足若以精進
而為莊嚴果報圓滿當能降伏天魔外道以
諸佛法而救度之若以禪定而為莊嚴果報
圓滿當得正念清淨法行具足若以智慧而
為莊嚴果報圓滿當得永斷一切邪見若以
大慈而為莊嚴果報圓滿能令一切眾生

伏一切微細煩惱若以大悲而為莊嚴果報
圓滿當得一切眾生心不厭捨若以大喜而
為莊嚴果報圓滿當得一切而無散亂若以
大捨而為莊嚴果報圓滿當得微細煩惱皆
悉除滅

龍主乃至以四攝法而為莊嚴果報圓滿當

得一切衆生隨順化導若以四念處而爲莊
嚴於身受心法悉能解了若以四正斷而爲
莊嚴能使一切不善之法皆悉斷滅得一切
善法圓滿若以四神足而爲莊嚴能得身心
皆獲輕利若以五根而爲莊嚴當得信進不
退心無迷惑了諸業因永滅煩惱若以五力
而爲莊嚴當得不愚不癡及得永斷貧窮過
失若以七覺支而爲莊嚴當得覺悟一切如
實之法若以八正道而爲莊嚴當能證得正
智若以奢摩他而爲莊嚴當得斷於一切煩
惱若以尾鉢舍曩莊嚴當得了悟一切法之
智慧若以正道而爲莊嚴當於有爲無爲一

切方便悉能了知

龍主我今略說十善之法而有莊嚴至於十力四智及十八不共之法乃至如來一切法分皆得圓滿

龍主乃至廣大解說此十善業道莊嚴之事當令修學龍主譬如大地能與人界一切國城聚落乃至林樹及藥草等而爲安住又復諸業皆有種子種子既有四大而成由如種穀初生芽莖乃至成熟皆依於地龍主此十善業道能爲天上人間一切有情勝妙安住能令一切有爲無爲得智慧果報一切聲聞及辟支佛乃至菩薩無上正等正覺而爲安

任亦復為一切佛法根本安住龍主我此所
說汝等一切當以正心而生信解
尔時娑伽羅龍王并在會諸菩薩摩訶薩一
切聲聞及天人阿脩羅乾闥婆等一切大衆
聞佛所說歡喜奉行

佛為娑伽羅龍王所說大乘法經

覺寤

二教音

寤

字夢

悟

上反

仇

二求

酬

